

Akta Kebebasan Maklumat akan dibentangkan akhir tahun

BERITA HARIAN 16 JUL 2025 m/s. 3

Putrajaya: Akta Kebebasan Maklumat bagi memperkukuh ketelusan dan memberi akses sebenar kepada rakyat dijangka dibentangkan di Parlimen hujung tahun ini, kata Datuk Seri Anwar Ibrahim.

Perdana Menteri berkata, usaha dalam kerangka reformasi itu mencerminkan pendekatan menyeluruh dan tekad kerajaan untuk membina institusi yang kukuh, adil dan telus demi berkhidmat kepada rakyat dengan penuh integriti.

“Ini adalah langkah penting

dalam membina kepercayaan awam dan menggalakkan penyertaan rakyat yang bermaklumat dalam sistem demokrasi kita.

“Undang-undang ini akan dibentangkan di Parlimen menjelang akhir tahun ini supaya rakyat dapat menilai dan memegang kami (kerajaan) lebih *accountable* (kebertanggungjawaban),” katanya ketika berucap pada Majlis Penutup Persidangan Antarabangsa Tadbir Urus dan Integriti 2025 di sini, semalam.

Selain itu, Anwar berkata,

kerajaan juga dalam usaha meminda Akta Perlindungan Pemberi Maklumat 2010 (Akta 711) yang dijangka dibentangkan hujung tahun ini.

Jelasnya, ia bertujuan menyediakan perlindungan yang lebih menyeluruh.

“Ini termasuk memansuhkan pengecualian terdahulu yang menghadkan perlindungan serta menubuhkan sebuah Jawatankuasa Perlindungan Pemberi Maklumat yang bebas bagi memastikan pelaksanaan lebih berkesan,” katanya.

